



**Sud Bosne i Hercegovine  
Суд Босне и Херцеговине**

---

**Broj: S1 3 P 037345 20 Iž**  
**Sarajevo, 13.10.2020. godine**

Sud Bosne i Hercegovine, u drugostepenom vijeću sastavljenom od sudija Dinke Bešlagić Čovrk kao predsjednika vijeća, Vesne Trifunović i Srete Crnjaka kao članova vijeća, odlučujući o žalbi Dine Bukvića iz Njemačke 71063 Sindelfingen Mercedesstrasse na odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 13.10.2020. godine, donio je

**RJEŠENJE**

Žalba se odbija.

**Obrazloženje**

Odlukom Centralne izborne komisije Bosne i Hercegovine broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020.godine jer nisu ispunjeni uslovi propisani odredbom člana 3.15 stav 1, 2 i 3 Izbornog zakona Bosne i Hercegovine.

Navedenom odlukom odbijena je prijava Bine Bukvića koji je blagovremeno izjavio žalbu u kojoj je naveo da je podnio urednu prijavu na obrascu koje je zaprimila Centralna izborna komisija BiH.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer žalitelj nije predao prijavu koja je ispunjena jer nije imala lične podatke podnosioca žalbe, statusu u kome boravi van BiH, izjašnjenje o opciji glasanja, podatke o adresi prebivališta u BiH i boravka izvan BiH na koju će biti upućen glasački materijal, te kontakt podatke.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije BiH kojom je odbijena prijava žalitelja za upis u izvod iz Centralnog biračkog spisa za glasanje izvan Bosne i Hercegovine jer imenovani nije predao prijavu sa potpunim podacima. Uvidom u prijavu je utvrđeno da se žalitelj dana 29.08.2020.godine putem elektronske pošte u 20,27 časova prijavio za glasanje putem pošte i u prilogu dostavio obrazac prijave i fotokopiju važećeg pasoša. Uviom u prijavu utvrđeno je da je samo potpisana od strane žalioaca, dok su sve rubrike nepopunjene. Nadalje je utvrđeno da je ova prijava zaprimljena od strane Centralne izborne komisije BiH što je potvrđeno i putem maila koji žalitelj uz žalbu prilaže.

Prilog žalbe koju je žalitelj dostavio u vidu popunjene prijave, fotokopije pasoša i ištampana prepiska elektronskom poštom, bez uticaja je na pravilnost ožalbene odluke. Naime, žalitelj je dostavio prepis elektronske pošte od 29.08.2020. godine poslate u 10,26 časova naslovljene kao prijava za glasanje putem pošte. Međutim ispod naziva dokumenta nema naznake da su uz poruku dostavljeni i dokumenti u prilogu. Proizilazi, da je žalitelj vremenski prvu prijavu dostavio bez traženih potrebnih prilogu, da bi minut nakon toga uputio novu poruku sa prijavom u prilogu i fotokopijom pasoša, ali ta prijava je bila nepopunjena potpisani obrazac.

Budući da je Centralna izborna komisija BiH nesumnjivo zaprimila nepopunjenu prijavu, to dostavljanje popunjenog obrasca u prilogu žalbe nije relevantno, jer zaprimljena prijava nije sačinjena u skladu sa članom 3.15 stav 1 Izbornog zakona. Time prijava ne ispunjava uslove propisane u citiranoj odredbi pa nije bilo zakonskog osnova da se žalitelj upiše u izvod u Centralni birački spisak za glasanje van BiH, kako je to propisano članom 3.15 stav 6 Izbornog zakona BiH.

Predmetnom odlukom žalitelju nije uskraćeno biračko pravo jer se, shodno odredbi člana 3.16 stav 2 citiranog zakona, nalazi u izvodu iz Centralnog biračkog spiska za glasanje u osnovnoj izbornoj jedinici u kojoj ima prebivalište u Bosni i Hercegovini.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA  
S U D I J A**

**Dinka Bešlagić Čovrk**